

潛研堂金石文跋尾

游研堂金石文跋尾續第四

嘉定錢大昕

宋

篆書千字文

乾德三年十二月

右石刻千字文南岳講華嚴法界觀賜紫沙門夢瑛篆并古文  
題額前攝涇州節度巡官袁正己隸書推誠奉義翼戴功臣永  
興軍節度管內觀察處置等使特進檢校太尉同中書門下二  
品行京兆尹上柱國濮陽郡開國公食邑二千七百戶食實封  
八百戶吳廷祚建宋敏求春明退朝錄云唐大帝時始有同  
中書門下三品其時中書令侍中皆正三品大歷中竝升爲二  
品晉天福五年升中書門下平章事爲正二品國初樞密吳廷  
祚以父諱璋加同中書門下二品用升品也以此碑證之良然  
曾子同隆平集吳廷祚傳云宋興加中書門下三品宋史亦同

皆傳寫之誤夢英字从王旁亦惟見於此

涇州回山重修王母宮記

咸平元年

右涇州回山重修王母宮記翰林學士承旨刑部尚書知制誥判吏部流內銓事陶穀撰推誠宣力翊戴功臣彰化軍節度涇渭等州觀察處置押蕃洛等使光祿大夫檢校太師兼御史大夫上柱國清河郡開國公食邑三千戶食實封八百戶張鐸建其文云太師清河公受脤建牙三臨安定歲戊辰春二月公介圭入覲天子設庭燎以延之奏肆夏以寵之臨軒絕席以綏懷大輅繁纓以錫命禮成三接詔還舊鎮攷宋史張鐸傳但云復鎮涇州其三任年月史無文以證之矣戊辰歲入覲詔還鎮及清河郡公之封皆本傳所未載戊辰則藝祖開寶元年也碑立於開寶二年以書有誤咸平元年請南岳宣義大師夢英重書

齊末列知涇州軍州事柴禹錫等名距立碑之日蓋三十年矣  
地理志涇州安定郡太平興國元年改彰化軍節度今鐸建碑  
在開寶之初已稱彰化軍節度則涇之建節鎮不始于太平興國  
矣

頒行莊子詔

景德三年八月

右頒行莊子詔文云中書門下牒奉敕莊史元言理歸于冲漠  
郭象爲注義造于精微既廣元風實資至治朕仰宗古道俯勸  
蒸民言念此書盛行于世尚多踳駁已命校讎將永煥于縑緗  
宜特滋于雕鏤牒至准敕故牒景德三年八月五日右諫議大  
夫參知政事趙兵部侍郎參知政事馮工部尚書平章事王皆  
不書名以史攷之蓋王旦馮拯趙安仁也

陳摠等題名

景德四年十一月

右陳揔等題名文云大宋景德四年仲冬月二十有二日知軍州事陳揔前知軍州事劉起與新授知新州吳有鄰洎司理參軍章堯臣高要縣主簿劉均同遊是室起凡四至并題凡六行其文左行翁學士方綱錄七星巖宋人題名多至卅餘通而此刻獨未之及劉起陳揔二人攷廣東通志攷守題名亦遺之吳有鄰通志作有璘皆可據石刻以證其闕謬也

登泰山謝天書述二聖功德銘 大中祥符元年十月

右登泰山謝天書述二聖功德銘真宗御製御書大中祥符元年十月二十七日御書院奉勅模勒上石宋史禮志載玉冊玉牒文而未及此銘略之也碑在泰安府城南門外五石合成高九尺廣二丈三尺一寸額高二尺八寸廣五尺五寸碑北向明巡按吳從憲篆刻其陰曰泰陰碑俗謂之陰字碑泰安人聶劍

先爲予言此碑有二一勒山下所謂陰字碑也一勒山上在唐  
磨崖碑之東字徑二寸明嘉靖間俗吏鄧人汪坦大書題名又  
汝南人翟壽題名及書德星巖三字竝饒蓋于上每行毀三四  
十字不等尚有字句可讀篆額登泰山謝天書述二聖功德之  
銘十三字完好如初文獻通攷王欽若言唐高宗元宗二碑之  
東石壁南向平峭欲卽崖成碑以勒聖製上曰朕之功德固無  
所紀若須撰述不過謝上天敷佑敘祖宗盛美爾命勒石北向  
以答天眷元好問東遊略記云嶽頂封禪壇下有唐宋磨崖據  
此則真宗述功德銘先經磨勒岱巔後又立碑城南也乃後人  
第知有城南之碑不復知有岱頂之碑矣

棣州防禦使檢校太保石保興碑

大中祥符四年十二

右棣州防禦使檢校太保石公碑翰林學士楊億撰文待詔尹

熙古書并篆額碑下截多剝落名字不可見以史攷之蓋守信之子保興也所述歷官先後與史略同惟保興由銀夏綏麟府州都巡檢丁內艱起復澶州駐泊都監而傳書除澶州都監于巡檢銀夏綏之前又失書母喪起復事傳又云淳化五年爲永興軍即京兆府鈐轄改夏綏麟府州鈐轄據碑保興自京兆府兵馬鈐轄徙延州路鈐轄無再任夏綏事皆當以碑爲正碑云公初名貞太祖改錫今諱傳云本名保正者史家避仁廟嫌名易貞爲正也守信追封衛王累封秦王保興封西安郡公追贈貝州觀察使史皆當書而不書可據碑以補之碑云歸葬河南洛陽縣平樂鄉宣武村梓澤原之先塋近時黃觀察叔瓌撰中州金石攷按羅洛陽碑碣甚富獨不及此碑何也

靈祐觀中書門下牒

天禧五年十月

右靈祐觀中書門下牒今在吳縣之洞庭山林屋洞有文稱蘇  
川重修林屋洞神景觀奉勅宜賜靈祐觀爲額業松陵集皮陸  
鳴和有曉次神景宮及三宿神景宮詩是唐時本名神景宮而  
此牒稱神景觀豈宮觀之名可通稱歟抑宋初嘗改宮額爲觀  
而志吳郡者偶失載歟牒尾列銜者四人曰吏部侍郎參知政  
事王者王曾也曰工部尚書參知政事任者任中正也曰左僕  
射兼中書侍郎平章事者馮拯也曰守司空兼門下侍郎平章  
事者丁謂也謂拯二人不書姓者周必大二老堂雜志云祖宗  
朝宰相官至僕射勅後乃不著姓他相階官自吏部尚書而下  
皆著姓此勅拯官左僕射謂守司空階又在僕射之上故皆不  
著姓也

朱顯之題名

慶歷二年十二月

三年二月附



右朱顯之題名其一云慶歷壬午歲鵬月郡守將朱顯之同監軍麥仲珣獄掾楊仲卿攝宦梁揆鄉秀崔宗周合浦貢士梁立本游茲勝境顯之謹題男諷捧硯詢詠侍立凡四行其文左行其一云轉運使尚書郎馬尋子正慶歷三年癸未歲二月二十二日游斯勝槩春宮吏知端州朱顯之從晦新賀州幕杜偉士遶新建昌邑佐許奇彥伯參陪顯之謹題凡八行竝在七星巖洞其書鴈作鴈參作叅皆俗體也

同游泐溪石室記

皇祐二年三月

右余靖游泐溪石室記後題今天子親享明堂之歲以史攷之蓋皇祐二年也泐溪在樂昌縣西北五里江夏黃昌齡子京知縣時靖以光祿少卿分司南京居韶暇日同遊因作斯記而昌齡書之宋史靖傳但云改將作少監分司南京居曲江不言轉

光祿少卿亦漏也

永通監記

皇祐二年十月

右永通監記宋史食貨志慶歷末韶州天興銅大發歲采銅二十五万斤詔卽其州置永通監今以此碑攷之韶州置監之議始于三司使葉清臣宋祁而轉運使傅惟口知韶州藥溫故成之宋史清臣祁本傳略不及此事未免失之闕漏記又云初祁之銅山五歲共市七萬前太守潘君一歲市百萬乃樂君繼之乃市三百萬明年又差倍之歲運美銅三百萬以贍嶺北諸治則歲采之數亦不止二十五萬斤矣王象之輿地碑目載余襄公所撰碑在韶州者凡五今惟泐溪石室記猶存而此記則象之所未著錄也

陶翼嵩臺石室文

皇祐五年仲夏

右陶翼書端州嵩臺石室文後題炎宋皇祐五年者宋以火德  
王仁宗康定初復因集賢校理胡宿之請於商邱爲壇祀大火  
以關伯配故有炎宋之稱矣文稱與前郡守丁寶臣元珍今郡  
守江東之唐公乘公之休縱游爲樂元珍歐陽文忠公之友也  
唐公之名蓋取唐相張柬之翁氏釋作東之蓋沿廣東通志之  
譌

重修南海廟記

治平四年十月

右重修南海廟記章望之撰記府帥尚書左丞集賢院學士某  
修廟事望之以古文名宋史入之文苑傳蘇子瞻正統論稱章  
子者卽其人也第史稱望之建州浦城人而此碑題武寧章望  
之未知其審宋時諸州守臣帶安撫使者謂之帥廣州守例兼  
經略安撫使品卑者則稱主管經略安撫司公事故云府帥宋

史職官志廣州帶安撫使兵馬鈐轄又云建炎初分置帥府以諸路帥臣兼其後廣州牧以都鈐轄爲稱今攷之石刻廣州諸守臣結銜如治平之呂居簡熙寧之程師孟已稱兵馬都鈐轄而南渡以後若乾道之陳輝咸淳之陳宗禮則又稱馬步軍都總管此類皆史之所不及載也

周茂叔題名 熙寧二年正月

右周茂叔題名在肇慶府之七星巖文云二年正月七日其上四字漫滅以朱文公所撰事實攷之蓋熙寧己酉任廣南東路轉運判官時也後有淳祐壬子呂中續題距濂溪題名已百有八十四歲矣上方橫刻濂溪周元公筆蹟七字當亦呂中所題也宋史藝文志有呂中國朝治迹要略十四卷未知卽此人否元公不以書法名而心畫端勁頗似顏平原聞德慶之三洲巖

陽春之銅石巖連州之中山竝有元公題字予所見者獨此爾  
廣韻鄭姓出廬江讀古是切今此姓盛於楚粵閒讀若曠此刻  
有鄭夢得一人必粵士也

康衛再經舊遊詩并陳惲和詩 熙寧二年三月

右康衛再經舊遊詩并陳惲和作刻於七星巖洞洞中有兩刻  
行款無纖毫異其一爲元豐末劉靜叔等大書題名所壓毀去  
什之六存者亦多漫漶其一尚完好而字迹較遜殆後來翻刻  
之本也別有題名十行云提點刑獄尚書郎康衛寶臣同提點  
刑獄文思副使王咸服叔平熙寧二年己酉歲三月初六日同  
遊郊社齋郎康聿侍郡牧守殿中丞陳惲題勒上石康陳二人  
行事宅書罕見以詩意推之衛又嘗知康州宅不可知矣

劉莘老題名 熙寧五年

右劉莘老題名在衡州府石鼓山之西溪云劉摯莘老來遊跋  
蹈侍凡九字其右方小字題云後百八十三年六世孫震孫蒙  
恩來持庾節拂拭舊題不任感愴寶祐二年秋九月旦凡三十  
三字按寶祐二年歲在甲寅上溯熙寧五年壬子實百八十三  
年莘老以論新法謫監衡州倉當在是時矣袁楠述其父師友  
淵源錄云劉震孫東平人忠肅公元孫文清公之子魏文靖公  
之壻晚歲爲宗正少卿兼中書舍人丁大全之貶新州也震孫  
以太常少卿權直舍人院繳奏乞移徙海島可謂剛鯁有祖風  
惜乎宋史不爲立傳未得詳其立朝顛末也跋蹈皆元豐元年  
進士跋字斯立宣德郎自號學易老人蹈藝源丞

許彥先藥洲詩

熙寧七年

右許彥先藥洲詩後題彥先再遊移穠穠穠穠侍彥先字覺之

元祐丁卯知隨州得漢碑于州之舜子巷徙置後園刻詩一篇於碑額蓋嗜古而好事者也王荆公集有選許覺之奉使東川詩

勅封順應侯牒

元豐二年七月

右勅封順應侯牒元豐初知齊州韓鐸祈雪龍洞山有應奏請加賜封爵因有此勅前列太常禮院奏十一行後列勅文五行皆正書而首行中書門下牒五字牒文內兩勅字行書勅字特大而縱蓋宋時勅牒之式如此末行押勅三人曰右諫議大夫參知政事蔡曰禮部侍郎平章事王曰工部侍郎平章事吳以史攷之蓋吳充王珪蔡確也碑在濟南府龍洞山之壽聖院又有元人重刻本亦在院中

韓忠獻公祠堂記

元豐三年正月

右魏國韓忠獻公祠堂記潁州團練推官將仕郎試祕書省校書郎知太平州繁昌縣事充定州州學教授郭時亮撰將仕郎守將作監主簿新充監瀘州倉草場滕中書并篆額案文獻通攷謂元豐未改官制之先大率以職爲階官以宰執言之如吏部尚書同中書門下平章事尚書禮部侍郎參知政事之類是也然所謂吏部尚書禮部侍郎者未嘗專有所係屬治其事則以爲職不治其事則以爲階官猶云可也獨選人七階則皆以幕職令錄之屬爲階官而幕職令錄則各有所繫屬之監司州縣遂至有以京西路某縣令爲階官而爲河北路轉運司勾當公事者有以陝西路某軍節度判官爲階官而爲河東路某州州學教授者有以無爲軍判官而試祕書省校書郎者其叢雜可笑尤甚今時亮任定州州學教授而帶潁州團練推官又帶



知太平州繁昌縣事正馬氏所譏爲義雖可笑者也初韓魏公守中山五年遺愛在民元豐元年十月潁川韓絳以建雄軍節度自河東移知定州民以其與魏公同姓也乃請于絳立廟圖像春秋祀焉碑在定州儒學

蔣之奇武溪深詩 元祐二年十一月

右蔣之奇武溪深一篇篇首用馬援辭而續其後凡二百九十言蓋知廣州日所作書法亦疎爽可喜又題其後云李君以神漢周府君功勲紀銘見示歐陽永叔集古目錄跋云碑石缺亡其名李君嘗往詣碑辨之乃是煜字永叔但得墨本故莫能攷也案歐公集古錄有兩跋後一跋云有國子監直講劉仲章爲余言前爲樂昌令因道府君事云名憬問何以知之云碑刻雖缺尚可識也趙洪諸家皆據歐公後跋定爲憬字穎叔未見此

跋故以爲莫能攷爾李旣觀詣碑所似得其實然隸書燥煜兩  
字本相近究難定其然否也後有元祐三年眞陽貢士李修跋  
碑額題寶文蔣公武溪深詩八字亦脩所書脩自稱門生蔣所  
稱李君者蓋卽脩矣碑左旁一行云右朝散郎知韶州軍州事  
譚粹元祐季秋六日自延祥禪院移立武溪亭今在韶州之九  
成臺

郭祥正石室遊

元祐四年二月

右郭祥正石室遊後題云宋元祐戊辰二月廿有八日當塗郭  
祥正子功來治州事卽明年以其日上書乞骸骨作石室遊一  
首刻之崖間記其姓名與山俱盡案宋史本傳云知瑞州蓋卽  
瑞州之譙南渡後避穆陵嫌名始改筠州爲瑞州此時不得有  
瑞州也祥正字功父此碑自題于功猶劉原父亦稱仲原也

韓魏公祠堂繪畫遺事記 元祐五年九月

右韓魏公祠堂繪畫遺事記左朝奉郎充龍圖閣待制權知開封府兼畿內勸農使王巖叟撰左通直郎充集賢殿修撰提舉西京嵩山崇福宮劉安世書左朝散郎試中書舍人韓川篆額三人皆元祐黨籍中人也記略云慶歷中朝廷有北顧憂始詔魏瀛鎮定竝用儒帥而公以資政殿學士帥定武天子倚公以安六年乃得去去後三十年民相與立祠于郡庠之西自康國韓公申國呂公爲帥旣釋奠夫子常率寮佐及諸生以一獻之禮祀焉元豐末歲興爲邑于安喜州之耆舊請繪公遺事于祠堂之兩廡未暇成而被召以去越明年公之子忠彥由禮部尚書以樞密直學士出帥定人喜曰吾家資政之子也因相與成之所云韓呂兩公謂韓絳呂公著也

仇公著墓誌 紹聖三年十月

右仇公著墓誌公著字晦之其先滄州人曾祖華以尚書駕部員外郎爲青州牧終而家焉後贈工部侍郎祖永尚書屯田員外郎父諒國子監丞王文安公公著姑之子也文安公由進士第一參預大政封其妣爲徐國太夫人而報其外族者甚渥嘉祐三年文安薨於位遺奏補公著太廟齋郎從宦四十許年終于定州觀察判官葬在青州永固鄉雲門里王文安者堯臣也誌銘柳子文撰晁端禮篆其蓋而王同老書之同老卽堯臣之子字體似東坡其書參爲篆體爲喪則俗體之甚者李南澗語予碑近出益都城西關口村南南陽水中今在村人楊士良家

游師雄墓誌 紹聖四年十月

右游師雄墓誌題云宋故朝奉郎直龍圖閣權知陝州軍府兼

管內勸農事兼提舉商稅等州兵馬巡檢公事飛騎尉賜緋魚袋借紫游公墓誌銘朝請郎直秘閣知潭州軍州兼管內勸農事兼荆湖南路安撫充本路兵馬鈐轄驍騎尉賜紫金魚袋張舜民撰朝散大夫直龍圖閣權知秦州軍州兼管內勸農事兼權發遣秦鳳路經略安撫使兼馬步軍都總管公事騎都尉賜紫金魚袋邵毓書端明殿學士中散大夫充涇原路經略安撫使馬步軍都總管兼知渭州軍州事管內勸農使上柱國賜紫金魚袋章綵篆蓋陝州稱軍府不云軍州者陝爲大都督府故也文獻通攷大中祥符六年詔龍圖閣學士直學士結銜在本官之上此碑惟章綵以學士結銜在散官上師雄舜民毓皆直閣故結銜在下宋史職官志安撫總一路兵政以知州兼充太中大夫以上或曾歷侍從乃得之品卑者止稱主管某路安撫

司公事染以侍從故得充經略安撫使餽但稱權發遣安撫使  
公事亦不正授之稱也潭秦渭三州守臣竝帶安撫使舜民餽  
以知州而兼安撫染以安撫使而兼知州結銜前後互異亦正  
授不正授之分也

重脩鳩摩羅什塔亭記

元符三年六月

右重脩鳩摩羅什塔亭記潞州上黨縣令甯祖武撰表白僧宗  
蟻書後列奉議郎知京兆府鄠縣事兼兵馬都監武騎尉李援  
名崇寧初編類元符臣僚章疏以附和紹述者爲正持正論者  
爲邪各分三等祖武名在邪中等援在邪下等蓋亦當時有志  
之士矣其云內翰蔡公者謂蔡京元祐中嘗知永興軍也

三十六峯賦

建中靖國元年九月

右三十六峯賦知登封縣四明樓昇試可所作僧曇潛書曇潛

一名道潛與東坡倡和所謂參寥子者也朱昂續觥觥說參寥住西湖智果院能文章尤喜爲詩坡南遷素不快者撫詩語謂有識刺得罪反初服建中靖國元年曾子開爲翰林學士言其非辜詔復祝髮紫方袍師號如故碑書于建中靖國元年九月正參寥初復師號時也

鄭敦義題名 崇寧元年

右鄭敦義題名云上自端王卽位升潛藩爲節鎮開府之初叨奉明命辛巳夏末到官壬午暮春暇日攜家來遊真陽鄭敦義凡七行行六字其文左行宋史徽宗紀元符三年十月乙卯升端州爲興慶軍宋時州有四等曰節度曰防禦曰團練曰軍事卽刺端州本軍事以徽廟潛邸升節鎮賜興慶爲軍額辛巳爲建中靖國元年壬午則崇寧元年也敦義蓋元符三年冬被命

次年夏到官又明年而題名於石室爾

米元章書藥洲二字

右米元章書藥洲二字在廣東布政司後堂東石上卽九曜石之一也其旁有元祐丙寅時仲公訓積中三人題名或疑亦元章所書予攷元章少時官舍光尉往來粵東西藥洲之題當在此時至元豐乙丑米年三十五官于杭明年歲在丙寅改元元祐不聞更入粵也九曜石在仙湖中卽所謂藥洲今學使公解後池上諸石林立多有宋人題字皆九曜之遺迹也此石不知何時移入藩解頤翁學使曾鈞幕米書嵌石西齋壁間幾欲亂真然延平神劍終須會合瓊苞移致不煩百夫力也

運使中奉詩

大觀三年十二月

右運使中奉遊七星巖詩額題運使中奉詩五字其詩云三四



奇峯倚短亭一巖清絕紀圖經四時吞吐西江水萬古森羅北斗  
星日月餘輝通碧落煙霞微徑上青冥嶺南惟此興王地好與  
邦人作畫屏後題予口歲口自龍江舍舟入端道由七星巖而  
此詩于石大觀己丑十二月初六日江陵宋述口攷廣東通志  
大觀間有轉運使宋述蓋卽其中奉大夫則其寄祿官也翁  
氏粵東金石略稱詩詞不可辨予到斯巖命工洗苔蘚精搨而  
諦視之猶歷歷可識也

御製八行八刑條

政和三年七月

右御製八行八刑條宋史徽宗大觀元年三月甲辰立八行取  
士科所謂八行者蓋取周禮大司徒之六行而益以忠和謂知  
君臣之義爲忠達義利之分爲和也八行之中以孝悌忠和爲  
上睦婣爲中任恤爲下是歲六月庚午令諸州學以御製八行

八刑刻石從江東轉運副使家彬奏請也八月庚午資政殿學士中太一宮使兼侍讀鄒居中乞以所賜御書八行八刑模刻于石立之學宮從之予所收者崑山縣學刻本政和中奉議郎知縣事蓋輿立石府學生陳克庭所書也史載崇寧三年詔諸路知州通判增入主管學事四字此碑末知縣丞尉結銜亦帶管句學事未審昉于何年案文獻通攷載紹興九年知建昌軍李長民奏宣和以前准知通令佐階銜並帶主管學事所云知通者知州通判也今佐者知縣丞尉也疑今佐帶銜與知通同時增入而史未之及耳碑稱管句而文獻通攷稱主管者南渡後避思陵嫌名追改之也丞簿尉皆縣佐此碑主簿一人獨不帶管句未審其故

政和御製五禮記

右政和御製五禮記今在大名府城西八里舊府城內宋金元之故治也碑甚大而字亦雄偉惜石已斷裂題署年月不復可攷矣宋玉海政和元年三月一日議禮局請以御書政和新修五禮序募勒于太常寺從之蓋五禮始刻石於東京開封府久已失傳陸務觀老學庵筆記云北都有魏博節度使田緒遺愛碑張宏靖書何進滔德政碑柳公權書皆石刻之傑也政和中央左丞子美爲尹昏毀之以其石刻新頒五禮新儀趙德甫跋何進滔碑亦云政和中大名尹建言磨去舊文別刊新制好古者爲之歎惜今大名之五禮碑當卽梁子美所刻也緒進滔之事固無足道然唐賢書法之工後人所當寶愛祐陵改修五禮意在粉飾太平而牧守建言輒爲毀人自成之舉上亦不以爲非也君侈而臣諂識者知宋祚之不長矣

古革題名 政和八年八月

右古革題名十行行十字正書云政和丁酉暮春程江古革逢  
時初自新昌移守興慶是年仲夏真陽馮齊荀祖道起於群除  
來貳府政相與咨詢有請於朝次年春乃被旨陞作大藩案宋  
史地理志肇慶府本端州軍事元符三年升興慶軍節度重和  
元年賜肇慶府名仍改軍額徽宗以端王入承大統踐祚之始  
升端州爲節鎮而州名猶仍舊至是固守臣之請改州爲府故  
云陞作大藩是年仲冬改元重和故石刻猶以政和紀年也徽  
宗紀政和三年十一月升端州爲興慶府重和元年十月改興  
慶軍爲肇慶府似政和三年已有府名與志自相抵牾以石刻  
證之知本紀爲誤矣周必大梅州貢院記太宗皇帝端拱元年  
放進士二十八人有古成之者與焉雖家廣之增城後徙于梅

其四世孫革遂登紹聖進士第此刻題程江古革其爲梅人無疑而廣東志以爲河源人亦誤

長者龔記

政和八年十月

右長者龔記在壽陽縣之方山相傳李長者故居也何遜春秋紀聞言張無盡丞相爲河東大漕日于上黨訪得李長者古墳爲加修治且發土以驗之掘地數尺得一大磐石石面平瑩無它銘款獨鐫天覺二字故人傳無盡爲長者後身今案此碑卽張天覺所撰文稱于元祐戊辰奉使河東行太原壽陽縣詣方山瞻李長者像於破竹經架中得長者修行決疑論四卷于元六相論一卷十二緣生論一卷梵夾如新從此遂頓悟華嚴宗旨于去彼三十年有住持僧宗悟來言於長者造論處發見龔基以磚石甃砌云云蓋李長者龔在壽陽不在上黨而天覺亦

無極地得石之事傳聞之多失一頁如此

清研堂金石文跋尾續第五

嘉定錢大昕

宋

吳郡重修大成殿記

紹興十一年四月

石吳郡重修大成殿記右宣教郎翟耆年篆額右朝散郎提舉兩浙西路茶鹽公事米友仁書左廸功郎新差充太平州州學教授鄭仲熊撰碑版之例撰人題銜在前書丹者次之篆額者又次之此碑正與相反蓋它碑題銜在前以右爲上此題銜在末以左爲上也吳郡志友仁以紹興十一年五月初四日到提舉任此碑以四月己巳朔建蓋友仁未到官之前所書爾米汝嘉以寶文閣直學士再知平江府而宋史本傳不載亦其闕漏也

紹興十八年進士題名記

右紹興十八年進士題名記第一甲王佐等十人第二甲甘焯等十九人第三甲索楊等三十七人第四甲孟致誠等一百廿二人第五甲戴幾先等一百四十四人案文獻通考是榜進士三百三十人省元徐履狀元王佐四川進士二十三人今以石刻證之寔三百三十二人朱初南省第一人殿試唱過三名不及則越眾抗聲自陳必得升等范蜀公避不肯言後遂以爲故事此榜徐履以省元而殿五甲未詳其故後讀張荃翁貴耳錄稱淳熙開省元徐履因功名之念太重遂有心恙之疾殿試卷子寫一枝竹題曰畫竹一竿送上試官朝廷亦優容之以省元身後一官與其子乃知履之殿甲蓋因心疾所致然履乃紹興進士而荃翁以爲淳熙間則記憶之誤爾又攷新安志是榜徽人登進士者鄭之純汪端彥俞舜凱與朱子凡四人端彥與朱



子皆籍婺源今檢此錄朱子貫建州建陽縣瑞彥貫饒州德興縣蓋宋世士大夫仕宦而去其鄉當時不以爲非而功令亦無寄籍之嫌也舜凱係特奏名第一人今附在第五甲之末宋史邱富江陰軍人隆興元年進士第三人此錄第五甲亦有邱富貫建州甌寧縣蓋別是一人也宋登科錄今已不傳此榜以朱文公故特存石刻在滁州之歐梅亭明人張明道跋

四十二章經

紹興二十九年十一月

右四十二章經石刻在杭州之六和塔特進尚書左僕射同中書門下平章事吳興郡開國公沈該左正奉大夫守尚書右僕射同中書門下平章事經雲郡開國公湯思退左中大夫知樞密院事陳誠之左中大夫參知政事陳康伯左太中大夫同知樞密院事王綸左太中大夫權吏部尚書賀允中左朝請郎試

尚書吏部侍郎兼史館修撰兼侍講葉義問左朝請大夫試  
尚書兵部侍郎兼侍講兼直學士院楊椿左朝散郎試給事中兼  
直學士院兼同修國史周麟之左朝散郎試中書舍人兼權樞  
密都承旨洪遵左朝散大夫充敷文閣待制提舉佑神觀楊傑  
左朝奉大夫權尚書吏部侍郎沈介左中奉大夫權尚書戶部  
侍郎趙令詠左朝奉大夫權尚書禮部侍郎兼侍講孫道夫左  
朝請郎權尚書工部侍郎王晞亮左朝請郎權尚書刑部侍郎  
兼權詳定一司勅令黃祖舜左宣教郎試起居舍人兼權中書  
舍人張孝祥左朝請大夫太常少卿兼權中書門下省檢正諸  
房公事宋棐左朝奉大夫守宗正少卿金安節右朝請郎守大  
理少卿李洪右朝議大夫司農少卿董革右中大夫行太府少  
卿錢端禮左朝奉大夫將作監張宗元左朝請大夫軍器監丞

運左朝請大夫尚書吏部郎中楊朴右朝奉郎守尚書戶部郎中兼權金部郎中莫濛右奉直大夫尚書刑部郎中路彬左朝散郎守尚書工部郎中張庭實左奉議郎守尚書吏部員外郎兼權尚書右司郎官周操左朝奉郎尚書吏部員外郎兼國史院編修官兼權樞密院檢詳諸房文字葉謙亨左朝奉郎尚書吏部員外郎兼國史院編修官胡沂左朝散郎尚書司勳員外郎陳俊卿左宣教郎守尚書司封員外郎鮑彪左朝請郎尚書考功員外郎陳棠左朝散郎尚書禮部員外郎楊邦弼左朝奉郎尚書祠部員外郎兼權國子司業張洙右承議郎尚書刑部員外郎黃子淳左朝請郎尚書都官員外郎兼玉牒所檢討官兼權戶部員外郎楊俟左奉議郎守尚書比部員外郎沈樞左朝請大夫行尚書屯田員外郎韓彥直左承議郎祕書丞兼國

史院編修官兼權兵部員外郎虞允文左奉議郎祕書省校書郎兼國史院編修官兼權尚書駕部員外郎洪邁凡四十二人各寫一章字體大小疎密不等唯允中端禮朴樸四人行書餘皆真書後有西蜀布衣武翔跋題紹興己卯十一月以史攷之是歲六月沈該罷左相陳誠之亦罷樞密其七月賀允中自吏部尚書參知政事矣此經蓋書於五月以前至仲冬始勒之石也自紹興己卯至今六百餘年字跡完好如新惟思退名爲後人磨去南渡石刻工妙若此者亦不易得矣

崑山縣校官碑 乾道二年正月

右崑山縣校官碑左朝奉郎提舉荊湖南路常平茶鹽公事吳郡范成象撰左朝請郎新知興化軍主管學事江夏黃萬頃書碑末列右朝散大夫直祕閣知平江軍府主管學事東陽沈度

右宣教郎知崑山縣主管學事河陽蔡結左宣教郎永主管學  
事開封趙善待左從政郎充平江府府學教授三山陳驥右脩  
職郎主簿主管學事清河張通之右迪功郎尉主管學事太原  
王齊興諸人名成象乾道五年爲工部郎時從弟成大除禮部  
員外郎援故事乞班兄下一時榮之萬頃隸書有法度碑額及  
題款略仿漢人之式

寂通證誓大師碑

淳熙三年八月

右寂通證誓大師碑唐時僧道廣居韶州之仁壽臺有道行南  
漢追謚輔聖大師又加謚證真寂照名其寺曰光運宋元豐五  
年賜今謚寺故有余襄公靖所撰塔銘今不存此碑乃淳熙初  
贛州免解進士孫時敏所撰并書文林郎知梅州程鄉縣事主  
管學事張槩題額

趙離七星巖詩并題名

淳熙四年十月

右趙離七星巖詩五言二十五韻疎宕有奇氣刻於巖洞中每句爲一行凡五十行其後題名三十二行字疎密不等云後儀趙離和仲以淳熙二年乙未來守肇慶適當殫之後以拙直理郡事日不暇給逮丁酉孟秋秩滿府僚俸給不積軍士廩餉如期尤幸聖澤遠被雨暘時若歲事豐穰訟平盜弭後使君過戌月未至始得與郡官同遊茲巖因賦詩命刻諸崖以紀時教授邱微之夢錫節度推官權倖許通亨之錄參傅濤次山高要令范念祖德脩司法邵穆幹臣四會簿尉權司理林奉先紹德高要簿李本師悅尉黃輔季全兵馬都監李濟巨川監押趙口冲大和同巡檢許浚少清前巡檢宮良弼彥輔寄寓前東莞邑宰孟恬口臣同來實十月惟前教官林致覺之戎官趙彥澤口口

以數十日前離任不與此行先是郡守之子滿曰伯清湜曰伯正泌曰伯淵浹曰伯廣洽曰伯淵汲曰伯升女曰淑口淑儀淑懿曾奉其母劉來游劉氏光烈之子光世之姪宋人題名稱攜家同遊者多矣此刻敎子女及妻詳而有法字跡亦佳翁氏金石略所錄與予釋文小異翁所得拓本脫去後二行搨手亦不精故也

趙善擇等題名

淳熙十五年正月

右趙善擇等題名正書十二行行十二字題於七星巖洞首云淳熙十五年上元前五日玉牒善擇智老伯奶景茂趙庚曰徐世亮正顯黃執矩才用羅口龜仲葛嶠景高徐盈謙夫口口臣夏卿陳飛英子聲陸口口口鄭公表若儀吳口口口口口國瑞聯轡來遊宋時宗室署名往往稱玉牒而不繫姓趙庚書姓者

非宗室故殊之也攷宗室世系表漢王房有善擇裔主房又有兩善擇皆太宗七世孫未審題名者何人也伯杻太祖七世孫系出燕王左朝請大夫子伋之子

太平州瑞麻贊 淳熙十六年八月

右太平州瑞麻贊鄱陽洪邁知州日近郊民於顯國得異麻以獻合數幹爲一若靈芝若如意若鳳垂頭邁以爲瑞圖其狀而贊之今在太平府學文云太歲在酉者淳熙十六年己酉歲也宋史本傳敘邁歷官極陳舛其知太平州傳亦失載予攷中興學士院題名邁以淳熙十五年四月由翰林學士差知鎮江府此贊作於己酉八月云予假守十閱月是移知太平卽在十五年之冬也其明年改元紹熙乃以煥章閣學士知紹興府除授次第班班可攷史於拜翰林學士之後卽書進煥章閣學士知



紹興府似未嘗有外補事又誤書紹熙爲淳熙皆失之甚者

同年礪唱詩 紹熙元年二月

右同年礪唱詩紹熙改元正月五日提點浙西刑獄建安袁說  
友起巖提舉浙西常平茶鹽浦城張體仁元善會同年之在吳  
下者於姑蘇臺與集者胥臺成欽亮仲鄰胥臺唐子壽致遠胥  
臺胡元功國敏浚儀趙彥衛景安浚儀趙彥璣中玉浚儀趙彥  
真從簡期而不至者浦城章解仲濟胥臺王藝文卿三山陳德  
明光宗桐川周承勛晞稷凡十二人人各賦七言律詩一篇皆  
隆興元年未待問勝進士也於是石湖范成大爲之序郡人龔  
頤正書而刻之石范公以資政殿學士奉祠家居集中多與起  
巖唱和之作起巖以淳熙十六年七月到任是年三月除直祕  
閣知平江府故范公集中始稱提刑後稱知府也宋史詹體仁

字元善建寧浦城人登隆興元年進士第光宗卽位提舉浙西  
常平除戶部員外郎湖廣總領卽此碑之張體仁也史作詹而  
吳郡志及此碑俱作張未知其審據吳郡志章澥爲吳人而此  
碑稱浦城蓋浦城之章居于吳者本有南北二族蓋稱北章悖  
稱南章但未知澥出何房耳碑載宋時進士登第旣朝謝揆日  
集貢院奉賜第錄黃於香案列拜庭下禮畢更以齒班立四十  
以上東序西鄉未四十西序東鄉推年最長若最少者各一人  
升堂長者中立南鄉少者北鄉春官吏贊拜少者拜又贊答拜  
長者洎兩序皆再拜謂之拜黃甲敘同年宋史雖有拜黃甲之  
名而語焉不詳故表而出之

張安國書

右張安國書盧坦對杜黃裳語石刻在衡州府學昔蔡行夫問

朱子云張子湖字何故人皆重之答云也是好但是不把持愛放縱此帖却以不放縱而益工也此帖亦刻于蘇州學但蘇刻橫行此則直行耳

蘇唐卿竹鶴二篆字

慶元丙辰孟夏

右蘇唐卿竹鶴二篆字字徑二尺許修倍之慶元二年臨川何異同叔以朝請郎提點浙西刑獄刻石立于憲治今在蘇州府學凡二石其陰皆張安國書亦同叔所刻一為疏廣傳中語一為盧坦對杜黃裳語

龔大雅義井題記

慶元六年十二月

右龔大雅義井題記吾邑南翔寺九品觀後廢園中有八角井周遭皆刻字大小不等驗其文乃宋慶元庚申歲沙埭里人龔大雅龔井題記此井在龔氏祖墳之旁具列高曾祖翁婆及伯

翁叔翁伯婆叔婆亡男亡弟媳婦外翁外婆丈人文母諸名氏  
以資冥福其墳今不知所在

南翔院觀堂記

嘉定九年季冬

右南翔院觀堂記僧居簡撰攷北淵集中爲南翔寺作者有懺  
院記僧堂記大殿碑陰記與此凡四今惟此記石刻猶存而文  
多漫滅可辨者才十之三與集本亦開有異同如集本稱昭文  
錢公象祖石本作昭文錢相國之類記末題嘉定九年季冬旣  
望而碑首題平江府嘉定縣縣建於嘉定紀元之十年蓋撰文  
之次年始書而刻之石爾予嘗見台州錢氏譜及常熟譜俱載  
端平二年理宗御製序序首云致仕大師左丞相錢象祖上疏  
今據此碑象祖卒於嘉定四年至理宗卽位已隔十餘年矣又  
歷寶慶紹定而至端平年代更遠遯不相涉故知錢氏譜序亦

後人偽託

徐龜年題名 嘉定十一年二月

右徐龜年題名云嘉定戊寅春二月望郡守嘉禾徐龜年率權高要令錄參趙汝襲勸耕於星巖凡五行行六字正書徑二寸五分後有題名四行云後二日汴人趙汝襲挈家來遊第汝附子崇崇下一字左侍溫陵謝廷玉莆陽阮時孺偕行字大徑一寸五分汝襲太宗八世孫系出商王房汝附其從父昆弟也

處州重刊孔子廟碑 嘉定十七年閏八月

右處州重刊孔子廟碑唐元和十三年刺史李繁修廟成韓退之爲文記之越十有二年爲太和三年始勒石蓋任廸所書趙明誠金石錄嘗列其目矣南渡以後唐碑已亡於是朝議大夫直龍圖閣提舉建康府崇禧觀賜紫金魚袋陳孔碩重書朝奉

郎權發遣處州軍州兼管內勸農事借緋主夢龍立石廸本行  
書孔碩易以小篆頗有法度惜經明人鑿補少生動之致耳宋  
時在外宮觀之名略見於徐氏却埽編馬氏文獻通攷而建康  
之崇禧獨不及焉攷乾道臨安志紹聖元年八月丁丑除知杭  
州王抃提舉江寧府崇禧觀則此觀之設官久矣觀在句容縣  
茅山

南雄州新建四先生祠記

端平元年三月

右南雄州新建四先生祠記四先生者周元公程純公正公朱  
文公也寶慶三年祠成州教授三山陳應龍請真西山爲文應  
龍以故去未及入石端平初毗陵張友知州事始命法掾田圭  
書之而教授盧自明篆其額焉頃歲翁學士方綱提學廣東搜  
羅石刻甚夥而南雄儒學宋元碑各一獨未之及予始訪得而

榻之

趙崇煥曾純倡和詩

端平二年十二月

右趙崇煥曾純遊七星巖唱和詩七言律各一首左方題名十  
一行行八字云端平乙未嘉平朔後二日權郡貳羊石趙崇煥  
德暢侍母偕權理曹新興寧令清源曾純景亮法掾三山趙彥  
嘯源叔權糾高要簿清源趙錚夫君玉寓公提屬清源莊世雄  
仲傑攜家同遊源叔子澥夫德暢子必錚侍聊紀歲月云以宋  
史表攷之崇煥太宗九世孫系出漢王房彥嘯則魏王廷美七  
世孫系出廣陵郡王房皆宗室也澥夫史作澥夫字之謫彥嘯  
於崇煥爲大父行以班秩退居於後其子侍行當論行輩故彥  
嘯子列崇煥子之前也廣東通志崇煥南海人嘉定十六年蔣  
重珍榜進士蓋以宗子寓居於粵者此刻前題浚儀舉東都舊

居後題羊石以南海有五羊石也景亮稱趙爲同年當是同榜進士

御書放生池勅 淳祐十年正月

右御書放生池勅初仁宗景祐三年有詔乾元節諸州軍設宴毋得多殺物命至是理宗申明故事御書勅旨令於所狂放生池刻石今崑山縣之清眞觀故宋放生池也石刻尚存下方有知縣項公澤跋惜經明人翻刻神采已失宋時知縣結銜側兼弓手兼兵軍正石刻訛弓手爲巴王明人之不學如此理宗又嘗製訓廉護刑二銘戒飭中外計江以南必尚有摹勒上石之本惜予未之見也

廣州光孝寺大鑒禪師殿記 咸淳五年十一月

右廣州光孝寺大鑒禪師殿記咸淳五年十一月初七日華文



閩直學士通奉大夫廣南東路經略安撫使馬步軍都總管兼  
知廣州軍州事兼管內勸農使陳宗禮記朝散大夫提舉廣南  
東路常平義倉茶鹽公事兼權運判冷應激題蓋宣教郎知廣  
州南海縣主管勸農公事兼弓手寨兵軍正王應麟書今在寺  
之六祖殿前楷書頗有法嶺南人以爲王伯厚筆也予攷伯厚  
以淳祐元年登進士寶祐四年中博學宏辭科至度宗時名位  
已高無緣出爲縣令宋史本傳亦不云知南海縣疑別是一人  
與厚齋同姓名者爾宗禮字立之應激字公定宋史皆有傳予  
後讀宋清溪集有封承事郎給事中王公穀墓版文其祖應麟  
知南海縣事乃悟碑卽此人所書乃泉州晉江人非浚儀王氏  
也

金剛般若經

右金剛般若經石幢八面在歷城縣南關正覺寺經文則鳩摩羅什譯本也後題齊州格聖禪院金剛般若波羅蜜經幢頌并序序文漫漶惟此邱處密俗姓韓數字可辨不著撰人姓名亦無年月驗其字畫當是宋刻政和六年以英宗由齊州防禦使入繼升齊州爲濟南府碑稱齊州當在政和以前又恆字眞宗御名此碑竝未缺筆疑是宋初所立矣

金

重脩蜀先主廟碑

承安四年四月

右涿州重脩蜀先主廟碑王庭筠撰字體遒勁郝陵川所云書法二王作眞行得意頗勝如時花者也朱錫鬯曰下舊聞載此碑全文但改題中蜀先主爲漢昭烈帝又脫洛三十餘字舛誤者亦數字皆當據石本正之張桓侯字益德見於蜀志本傳惟

世俗所傳三國演義譌益爲翼錢遵王謂內府板演義猶未譌  
此碑本作益德而日下舊聞亦譌爲翼蓋錫堂得之傳抄未嘗  
親至碑所也

潛研堂金石文跋尾續第六

嘉定錢大昕

元

湛然居士功德疏

太宗辛卯年九月

右湛然居士功德疏其文云湛然爲萬卦山天寧萬壽禪寺命僕爲功德主者惟萬卦之古刹實萬松之舊遊有虛己飛書請湛然作主勉爲提領良慰殷勤山色水聲永作道人活計漁歌樵唱偷傳衲子家風謹疏辛卯年九月二十九日中書省都功德主湛然居士凡八行年月間鈐中書省印湛然居士下有押湛然居士者中書令耶律楚材也金元之間有僧行秀者號萬松野老楚材從受記荊法名從源號湛然居士自稱萬松嗣法弟子辛卯蓋元太宗之三年是時蒙古未有年號也篆額明省功德疏五字謬妄已甚而守一道人書頗似黃山谷

中書省公據 辛卯年十月

右中書省公據付交城縣萬卦山天寧禪寺准此年月開立鈐  
省印後列朝省使省都事書記諸人及太原府西三縣宣差都  
總管謝未欽交城縣長官覃資榮名覃資榮元史有傳資榮子  
澄又見良吏傳皆書作譚此碑乃作覃予又得濟源縣濟瀆廟  
中統元年五年兩石刻並列總管覃澄名久王暉中堂事紀載  
懷孟總管覃澄元史世祖紀至元十一年副元帥覃澄亦皆作  
覃因據以正史文之誤

祭濟瀆記

中統元年八月

右祭濟瀆記文云皇帝嗣登大寶建元之初特遣提點太醫院  
事許國楨馳驛徧告后土嶽瀆降香崇祀元史世祖紀及國楨  
傳俱失載此事楨字史以示碑以木當以碑爲正碑爲權懷孟

州教授李忠國撰而後列從行降香官有宣授懷孟州達魯花赤密里及宣授懷孟州總管覃澄提領懷孟州課稅所官石伯濟蓋其時雖立總管猶未稱路元史地理志懷慶路唐懷州金改南懷州元初復爲懷州太宗四年行懷孟州事憲宗六年世祖在潛邸以懷孟二州爲湯沐邑七年改懷孟路總管府攷元太宗時立十路課稅使世祖中統元年立十路宣撫司每路所轄郡縣甚廣尚沿宋金之舊志以爲憲宗時改懷孟路者誤矣王惲中堂事紀載中統二年奉聖旨道與真定路宣撫司據懷孟達魯花赤密里吉總管覃澄奏告管下地分多有屯住蒙古頭目遇有關涉詞訟公事不肯前來對證往往不服勾追以致遲滯公事准奏仰徧諭諸路宣撫司今後各州城管民官遇有關涉蒙古軍人公事理問時分管軍官一員一同聽斷施行無

得偏向准此是懷孟隸真定路宣撫司不得自稱路也蜜里乃者曷思麥里之次子元史作密里吉中堂事紀作蜜里吉此作蜜里及蓋譯音之轉

重立孟州三城記

中統五年八月

右重立孟州三城記元史曷思麥里傳壬辰授懷孟州達魯花赤癸巳遣蒲察寒奴乞失烈札魯招諭金總帥范真率其麾下軍民萬餘人來降碑稱壬辰天兵南渡有京西總帥范公率諸部衆濟所帶虎符并次下金銀牌印歸附大朝更賜金符治所屬之民兼領於孟卽其事也碑又稱河南甫定孟衡邊鄙版籍仍希爲懷所併攷元史地理志懷州太宗四年行懷孟州事而曷思麥里父子三人世襲懷孟州達魯花赤此元初併孟於懷之證蓋中統紀元以前孟未嘗自爲州也碑又稱中統二年欽

奉聖旨宣授孟州長官并降到立城民戶至中統四年二月宣  
差孟州達魯花赤阿里理任新附之民而併治之是孟州之設  
在中統開而地理志於懷慶路下云世祖托潛邸以懷孟二州  
爲湯沐邑於孟州下云故城謂之下孟州新城謂之上孟州元  
初治下孟州憲宗八年復立上孟州略不及併省孟州事可謂  
疎而外矣然史稱憲宗八年復立上孟州者其誤亦有因據是  
碑稱丁巳年欽奉恩命復立新孟丁巳卽是憲宗七年與志復  
立上孟州之文頗合而其下文有荒殘廢邑復見儀刑云云又  
有儻一旦功成改除他邑云云曰邑不曰郡則縣而非州也其  
所謂復立者移縣治於新孟州城非卽立爲州也而史遂以爲  
州所治不亦謬乎中統五年卽至元之元年以八月改元建碑  
之時改元之詔猶未下也



王惲漢柏詩

至元二十一年五月

右王惲漢柏詩在泰安府嶽廟碑後題銜兩行云至元二十一年五月己酉朔中議大夫山東東西道提刑按察副大使汲郡王惲題按惲所歷官詳見其子公孺所撰神道碑其轉中議大夫則碑亦未之載也次行之下又有數字云還一作潛字秀一作照字此後人據秋澗大全集本校其同異而附注之者

樓觀宗聖宮說經臺記

至元二十一年陽復日

右樓觀大宗聖宮重修說經臺記宣授陝西五路西蜀四川道教提點古汭李道謙撰文宋王秋澗集有贈道者李雲叟詩序云道人諱道謙出東齊世家年十六棄家入道禮丹陽馬公高弟劉爲師既冠遊諸方洞天參求元契又嘗園居於陝多積靜功今主東雍之神霄宮曰雲叟者蓋其別號云此碑自署夷山

天樂道人又題古汴

汴字即汴

蓋先世自齊而徙於汴者歟文稱掌

教清河大宗師者長春真人之弟子尹志平也論語竊比於我  
老彭包咸以老彭爲殷賢大夫鄭康成王輔嗣則以老爲老聃  
彭爲彭祖陸德明莊子晉義又引一說謂彭祖卽老子碑引孔  
子竊比老彭及猶龍之語是亦以老爲老聃矣

孟州學記

至元二十三年十月

右孟州學記應奉翰林文字傅夢弼撰述達魯花赤抄海知州  
郝采鱗同知弋惟敬興建學校之事云同簽樞密院事趙公願  
以勅賜溫縣駝塢村地千二百畝贍學案元史趙良弼傳至元  
十九年得旨居懷孟良弼別業在溫縣故有地三千畝乃析爲  
二六與懷四與孟州皆永隸廟學以贍生徒與碑所書合三千  
之千二百正所謂十分之四也郝采鱗史附見其父經傳不云

爲孟州知州略之也楷法似蔡忠惠惜不題書者姓名

應宜兒赤獵虎記 至元二十六年九月

右應宜兒赤獵虎記文與書法俱劣至元二十六年鍾離定遠二縣民所立以頌淮東淮西鷹房屯田打捕總管府達魯花赤應宜兒赤爲民除害之功後題江淮等處行尚書省劄付鍾離縣遺碑市廵檢王侃郭直立石濠州時稱臨濠府屬江淮行省至元二十八年改江淮行省爲江浙行省別立河南江北行省畫江爲界凡江北州縣皆改屬焉而臨濠亦降爲濠州矣碑今在鳳陽縣西南劉府集東嶽廟知縣宛平孫君維龍以予嗜石刻乃募工搨一本見寄予攷王象之輿地碑目唐杜亭碑在鍾離縣西七十里遺碑拭元和中太常寺協律郎杜牧作象之宋南渡時人稱此碑尚存市名遺碑蓋以此今小杜碑久亡明初

勳臣東勝伯劉謙居此土人因呼劉府集而遺碑之名縣人無知其故者孫君方撰鳳陽新志因書所聞以遺之

增修扁鵲廟記至元二十八年四月

右增修扁鵲廟記今在彰德府湯陰縣其云皇太孫梁王者晉王甘麻剌世祖之孫裕宗之長子時以梁王出鎮雲南故云開府西南海夷也元初諸王之子通稱太子然不得稱皇太子以示別也甘麻剌以嫡長孫稱皇太孫是當時固有儲貳之望其後讓國成宗退守藩服有吳泰伯風故至治之末中外推戴晉王之子無異言及天歷干位乃昌言晉邸不宜立誣罔之詞難以取信於天下後世矣

居竹記大德二年二月

右居竹記華亭縣修竹鄉曹氏武惠王之後自汴南徙所居

九峯三泖之勝元初有名和甫字仲達者扁其書室曰居竹前  
建德路總管方回爲文以記而太原路汾州知州趙孟頫書之  
今在華亭縣學後題雲間穆奎同男文正摹刻

蕭山縣學重建大成殿記 大德三年十月

右蕭山縣學重建大成殿記碑所載至元壬辰廉訪副使王侯  
大德戊戌副使拜降僉事王煥皆浙東廉訪司也浙江通志失  
載侯煥二人名侯官終大名路總管諡憲肅拜降北庭人仕至  
資國院使贈江浙行中書省右丞諡貞惠

松江寶雲寺記 至大元年五月

右松江寶雲寺記前朝奉大夫大理少卿牟獻撰集賢直學士  
朝列大夫趙孟頫書資德大夫江浙等處行中書省右丞廉密  
知兒海牙篆額牟獻入元不仕所題者宋官故稱前以別之廉

密知兒海牙者廉希憲之子恂也元史英宗紀延祐七年七月以廉恂爲中書平章政事至治二年十二月廉恂罷宰相表延祐七年至治元年二年平章政事無廉恂而有廉米只兒海牙蓋廉米只兒海牙卽廉恂猶梁暗都刺卽梁德珪段那海卽段貞洪雙叔卽洪君祥皆一人而二名也紀傳據誌狀之文多用漢名表所據者案牘之文故多從國語此碑所題亦當時本稱米只之爲密知則譯音之轉爾廉氏系出畏吾雖讀儒書取嘉名仍循國俗以畏吾語小字行見於史者惟希賢一名中都海牙至如希憲一名忻都恂一名米只兒海牙以予博考二十年始能知之蓋元史之難讀視它史爲尤甚也

萬安寺茶廟 至大二年正月

右萬安寺茶廟雪庵頭陀溥光撰并書上座德嚴刻石於嵩山

戒壇寺葉井叔云今移在城西峻極下院雪庵俗姓李氏賜號  
圓通元悟大禪師元時集賢院學士往往以樸道參之雪庵以  
頭陀而官昭文館大學士亦其比也自大德至至治三十年間  
趙魏公書爲朝野推重一日中官李邦寧傳太后懿旨命魏公  
書興聖宮額魏公曰禁扁皆李雪庵書公宜奏聞既有旨命李  
當時爵魏公謙讓爲不可及昔王子敬不肖題太極殿榜魏公  
之讓意或出此然亦見雪庵大字之可貴矣

江東宣慰使珊竹公神道碑

至大

右江東宣慰使珊竹公神道碑集賢大學士榮祿大夫姚燧撰  
文中順大夫揚州路泰州尹兼勸農事趙孟頫書并篆額珊竹  
公者北京兵馬都元帥吾也而之孫名拔不忽其師周正方更  
名之曰介而以仲清字之初任同知北京轉運司事累遷濮州

尹平灤路總管江南浙西道提刑按察使江北淮東道提刑按察使召爲刑部尚書復除江東宣慰使以病目去家真揚間延名儒張璠吳澄教其子至大元年十月卒元史吾也而傳失載其名故具錄之史作吾也而碑作烏也而按疑撰制詞作烏野而其子雲禮碑作撒里譯音無定字也趙子昂以至大二年七月除揚州路泰州尹明年十月拜翰林侍讀學士此碑之立當在至大二三年間

集仙宮重建東嶽行祠記

皇慶元年三月

右集仙宮重建東嶽行祠記嘉定設縣之始東嶽祠本在縣西紹定戊子乃遷於集仙宮之東廡所謂令尹陳公者以縣志題名攷之蓋永嘉陳邁也集仙宮勅額本在安吉縣道士葉子琬始請移揭於此此皆談邑故者所宜知也張興材著銜太素凝



神廣道明德大真人元史釋老傳亦未及載碑書靈作灵此俗字亦有所本案廣韻十五青有灵字注引字類云小熱貌說文灰从又从火則灵卽灰之異體灰者火之餘美故又有小熱之訓不知何緣轉爲靈音世俗遂以同紐借用集韻青部却不收灵字殆以其俗體而芟之歟

集仙宮瑞竹記

皇慶元年三月

右集仙宮瑞竹記與東嶽行祠記同時立驗其筆跡亦張與紹書也碑陰畫枯竹一株節間細書倒插竹三字旁畫新竹六七竿有兩處題字曰三年竹曰四年竹又間以嫩枝數叢筆法不減吳仲圭其下方題七言古詩一篇自署元真子不著姓名元時集仙宮道士孫應元嘗於齋前倒插竹一枝已而得活三四年後竹遂成林因以瑞竹名其軒而第三十代天師張與材

記之文雖未工亦見當時羽流之好事也予又憶吳禮部集有嘉定黃氏瑞竹詩其一云練川誇瑞竹黃氏見高門富麗應如此時來豈有根蓋同時有兩瑞竹事邑志惟載集仙宮瑞竹而黃氏竹鄉人鮮有知之者矣

大都路總治碑

皇慶二年十月

右大都路總治碑翰林學士承旨王構撰文立言有體集賢大學士劉賡書亦謹嚴不失唐人法度蓋元刻之佳者碑在今順天府公廨大堂前完好可搨而朱錫望日下舊聞略不及焉文稱至元丁卯春既城大都卽以路總京畿自乙酉解爲宗正據有而徙之冬官者踰二十寒暑至大初元勅中書還北省而六卿所舍悉如其舊至假屋於民以庀事再徙迄無定所詳其文義蓋自大都路公廨爲宗正所據移治工部者閱二十餘年及

中書還北省六部各歸其署由是大都路總管無所容而假屋於民耳孫氏春明夢餘錄謂官署爲宗正所據官吏辦事佛寺中者乃臆說也武宗之世遙授之官衆莫吉以平章政事行大都路達魯花赤王泰亨以平章政事商議中書省事行太子詹事皆非正授故宰相表不列其名碑文撰於至大二年三月至皇慶二年十月建相距僅四年餘而碑末列達魯花赤總管兼府尹副達魯花赤同知諸人名無一與前同者官吏之輕於更代如此欲其盡心職守難矣泰亨字子通一字仲通晉寧人嘗從許文正公學晚歲自號康莊老人諡清憲

長興州東獄行宮記

延祐元年四月

右長興州修建東獄行宮記略云自唐封禪而郡縣始咸有東獄祠其在長興者初建於宋紹興戊午久壞不治知州呂澍同

知馬鎔捐祿廩爲衆倡葺而新之殿東建太室以奉聖母卽今所謂碧霞元君矣先君中憲少習趙書收藏趙帖甚夥率爲友人借失今所著錄惟寶雲寺圍通寺及此三碑猶是先人手澤也

少林開山裕公禪師碑延祐元年十一月

右少林開山裕公禪師碑福裕字好問號雪庭太原文水張氏子授具於休林古佛又事萬松老人憲宗時詔總領釋教世祖賜號光宗正法禪師皇慶元年以集賢大學士陳顥請追贈大司徒開府儀同三司封晉國公翰林學士承旨程鉅夫受詔爲之碑文

勅賜伊川書院碑延祐三年四月

右勅賜伊川書院碑始伊川鳴皋鎮砲手軍總管呂實戴以家

財勅立書院經營十年始就其子慕顏鉄木復建稽古閣貯書萬卷延祐間詣京師因集賢大學士陳顥以聞奉勅賜名伊川書院令翰林直學士薛友諒撰文集賢學士趙孟頫書之士希勗實戴之字也元史百官志回回砲手軍匠上萬戶府至元十一年置砲手總管府十八年始立爲都元帥府二十二年改爲萬戶府此勗實戴殆回回人而屯戍河南者歟

懿旨重修濟瀆清源善濟王廟碑

延祐三年九月

右懿旨重修濟瀆清源善濟王廟碑前應奉翰林文字奉議大夫潁州知州王公孺撰奉訓大夫懷孟路總管府判官王筭書榮祿大夫大司徒中都畱守蕭珍題額筭公孺之子也元史武宗紀大德十一年六月建行宮於旺兀察都之地立宮闕爲中都至大元年七月立中都畱守司八月以中都行宮成賞官更

有勞者賜同知畱守蕭珍金銀仁宗起至大四年正月罷城中  
都二月司徒蕭珍以城中都徵功毒民命追奪其符印此碑立  
於延祐初珍題銜仍稱大司徒中都畱守蓋罷斥未久而復官  
也文云維皇慶二年仲春之月儀天興聖慈仁昭懿壽元全德  
泰寧福慶皇太后遣使奉御奩香有事於濟瀆靈祠攷皇慶間  
皇太后尊號祇有儀天興聖慈仁昭懿壽元十字全德泰寧福  
慶六字乃延祐二年所加此撰文之日據加上尊號追書之非  
與史有牴牾也

勅賜龍興寺大覺普慈廣照無上帝師碑

延祐三年十

右勅賜龍興寺大覺普慈廣照無上帝師碑帝師者膽巴也元  
史釋老傳載皇慶間加號與此同惟普慈作普惠乃傳之誤碑  
稱師出家事聖師綽理哲哇爲弟子又稱武宗皇帝皇伯晉王

及今皇帝皇太后皆從受戒法又稱元貞九年爲梵書秦徽仁  
裕聖皇太后奉今皇帝爲大功德主主龍興寺皆史所未及攷  
仁宗初元贈膽巴謚松雪嘗奉勅撰文并書刻石大都至是僧  
迭瓦八乞刻石本寺復命松雪別撰文書之今真定原石久失  
此本乃後人翻刻入法帖者帝師八思巴元史有傳文宗紀輟  
耕錄及此碑皆作巴思八焚毀偽道藏經碑作八合思巴至  
元法寶勘同總錄序作拔合思八世祖紀作八合思八譯音無  
定字實則一人也

保定路孔子廟講堂記

延祐三年十一月

右保定路孔子廟講堂記元明善撰張珪書虞伯生稱張蔡公  
書腕力尤健端重嚴勁無慚筆諫之臣今觀是碑信然而書史  
會要不列其名豈非以功名掩歟元人不以同名爲嫌如監郡

曰教化的總管曰教化一蒙古人一河西人同官同時後人失於稽考往往混而爲一矣

祝延聖主本命長生之碑 或云延祐四年

右碑額云聖主本命長生祝延碑題云勅賜大龍興寺祝延聖主本命長生之碑古人書額文取簡要先後不必相應也予昔奉使過真定再宿茲寺訪得元碑凡四其一長明燈記延祐五年僧永恩書其一勝公和尚道行碑至正十三年荅失蠻撰趙儼書其一秦王夫人施長生錢記至正十四年王訪撰并書其一則此碑也松雪書法世人所重故閒有推拓者其它購之未得姑記其目於此執禮和台姓乃蠻氏官至河南江北行省平章政事元史附見其父囊加歹傳其官燕南河北道廉訪使史所未載也松雪在翰林日嘗撰中奉大夫殊祥院使執禮和台



封贈三代制此碑稱資善大夫資善階在中奉之上蓋由殊  
院使而遷廉訪矣

勅修殷比干廟碑

延祐四年十一月

右勅修太師忠烈公殷比干廟碑元史仁宗紀延祐三年四月  
壬午勅衛輝昌平守臣修殷比干墓唐狄仁傑祠歲時致祭碑  
所書者卽其事也紀稱四月壬午碑作季春壬子當以碑爲正  
司其役者衛輝路總管密邇阿散而潁州知州王公孺爲文記  
之翰林學士承旨劉敏中書丹御史中丞姚煒篆額敏中元史  
有傳公孺文定之子煒文獻之子竝以文學書法稱亦見家風之不  
墜也

勅建永壽禪寺記

延祐五年正月

右勅建永壽禪寺記在嘉定縣婁塘鎮無篆額亦無標題文云

延祐三年師說謹施平江路嘉定州管下田莊初建永壽禪寺  
上報國恩祝延聖壽次爲先考太師寧武保康軍節度使武忠  
和義郡王建立祠宇安塑神像四年十二月祠成其稱先考太  
師者呂文德也文德宋季大將其弟文煥守襄陽以城降元子  
姓皆至大官師說任江淮等處財賦副總管其事迹無攷龔尚  
書撰縣志謂何莊寺今日永壽寺呂蒙正寓此又云何氏宋初  
延呂蒙正爲塾師案蒙正以太平興國二年登第其時吳越尚  
未納土蒙正微時安得至此此委巷不根之語必因此寺初自  
呂氏遂謗爲蒙正爾永壽寺與何莊本非一地併而爲一當在明  
初近志謂宋時土民何氏建庵元祐中呂師說改建爲寺不知  
永壽之建乃在元之延祐非宋之元祐且係師說初建非因何  
氏之庵爲之也此碑昔人未有著錄者頃過婁塘埭夫陳君葯

耘導予往觀并拓其文見貽遂書以正縣志之謬

乾明廣福禪寺重建觀音殿記 延祐七年二月

右乾明廣福禪寺重建觀音殿記胡應青撰趙孟頫書并篆額  
李光暎以爲松雪撰者誤應青自題前進士又云予吳之鄙人  
宋季筮仕於此蓋宋臣而不仕於元者也暨陽今江陰縣

長明燈記 延祐七年二月

右長明燈記翰林學士承旨開府儀同三司特授河南行省左  
丞相楚儂帖穆而割田千五百畝入汴梁延津上乘寺爲長明  
燈資屬應奉揭傒斯爲記而承旨趙孟頫書之楚儂帖穆而者  
博羅歟之子楚先帖木兒也元史附見其父傳其由河南行省  
參知政事遷江西歲餘進河南右丞未行拜平章政事入知樞  
密院事皆史所未載碑載其子尼摩性吉福安等傳所載有尼

摩星吉亦思刺瓦性吉二人尼摩星吉即尼摩性吉亦思刺瓦性吉豈即福安乎抑別有名福安者而傳失載乎碑又云公娶完澤氏河南王之女攷延祐元年封河南行省左丞相卜憐吉帶爲河南王卜憐吉帶阿朮之子姓兀良合氏此完澤蓋名而非氏也元史泰定帝紀泰定元年開八八軍氏爲皇后八八軍實奚吉刺氏亦以名爲氏元人文集中似此稱謂者頗多

處州萬象山崇福寺記

延祐七年三月

右處州萬象山崇福寺記延祐五年西天目山幻住沙門明本撰文後二年正月翰林學士承旨趙孟頫書并篆額其三月始立石鵲字者東嘉孫宗年也松雪翁以延祐六年夏謁告歸吳興遂不復出據此碑所題歲月則南歸之後一年也明本號中峯所居號幻住庵仁宗時賜號廣慧禪師石刻明字漫滅故表

而出之

金仙寺裕公和尚道行碑

延祐七年小春日

右金仙寺住持裕公和尚道行碑松雪翁書法妙絕一時豐碑  
修碣流傳至今世所共珍其書裕公道行碑有二一爲少林寺  
僧福裕在河南之登封縣一爲金仙寺僧廣裕在山西之翼城  
縣予皆得之福裕碑程鉅夫撰此碑卽松雪所撰文而本集却  
不載首云佛以大慈悲隨機說法所以付囑其徒者攝爲五分  
曰素咀纒則阿難受持曰毗奈耶則鄒波羅受持曰阿毗達磨  
則迦多演那受持卽所謂經律論也曰般若曰陀羅尼則付之  
文殊普賢二大士近世學佛家能舉其名者尠矣

涇縣尹承務蘇公政績記

至治二年二月

右涇縣尹承務蘇公政績記自列翰林學士承旨榮祿大夫知制

制誥兼脩國史趙孟頫書國子博士承事郎

篆額亞中

大夫寧國路總管府推魯花赤兼管內勸農事某立石達魯花赤署名作蒙古書而立石與書篆人並列於前皆碑之勅例也碑爲松雪晚年書結體圓勁而不放縱蘇尹名濟字以舟益都沂人在官三載民歌之曰四民藝業通縣官有蘇公三載民無憂賴有蘇汝舟元史良吏傳不載特表而出之

潛研堂金石文跋尾續第七

嘉定錢大昕

元

東嶽廟聖旨碑

秦定元年十月

至正四年九月附

右東嶽廟聖旨碑文稱成吉思皇帝月古台皇帝薛禪皇帝完澤篤皇帝曲律皇帝魯顏都皇帝怯堅皇帝後題秦定元年鼠兒年十月二十三日又一碑文稱成吉思皇帝月古台皇帝薛禪皇帝完者都皇帝曲律皇帝魯顏都皇帝格堅皇帝忽都禿皇帝亦憐真班皇帝後題至正四年猴兒年九月二十九日宋成吉思太祖尊號也薛禪完澤篤曲律魯顏篤格堅忽都禿則世祖成宗武宗仁宗英宗明宗之諡身後所追上也太宗寧宗未有國語諡號故稱其名元史秦定卽位詔書稱英宗曰頑僭八剌皇帝其時尚未有國語諡也文宗國言曰札牙篤皇帝至

正碑不及者以其與於弑逆黜之也定宗憲宗泰定帝皆繼世之君當時叙諸帝略不及焉太廟七室之制則太宗亦不預重本生而輕正統禮臣亦未有援古義以爭之者明嘉靖之議大禮實濫觴於此矣月古台元史作窩闊台普顏都史作普顏篤忽都禿史作忽都篤亦作護都篤亦憐真班史作懿璘質班又如完澤篤之爲完者都格堅之爲怯堅而碑亦互異蓋譯音本無定字當時描諸王言亦未盡盡一也碑向在泰安府嶽廟西偏延禧殿前近歲修廟者磨去其文爲他用泰安人聶欽云

歸安縣建學記泰定五年正月

右歸安縣建學記歸安湖州倚郭縣故未有學附於郡學東偏南陽完澤溝化以進士丞茲邑始建縣學而鄧文原爲文記之後題泰定五年龍集戊辰人日記攷元史泰定帝紀是年二月



庚申詔天下改元致和故二月以前猶稱泰定也其秋帝崩於上都文宗卽位改元天歷元史三公宰相兩表於泰定四年之後卽繼以文宗天歷元年不書致和雖用溫公通鑑之例然七月以前拜罷略不載未免絀漏而無法矣

皇太后懿旨碑

至順二年六月

右皇太后懿旨碑凡元時聖旨碑首題長生天氣力裏大福蔭護助裏皇帝聖旨此稱長生天氣力裏皇帝福蔭裏皇太后懿旨當時寫聖旨懿旨之式如此後題難兒年十一月初十日大都有時分寫來又一行題至順二年歲次辛未六月吉日建案元代惟成宗武宗仁宗順帝四朝尊奉皇太后此碑建於文宗時所稱皇太后必在成武仁三朝矣成宗大德元年歲在丁酉武宗至大二年歲在己酉碑但稱難兒年有支無干不知當在

何年也或難予曰元史后妃傳仁宗莊懿慈聖皇后英宗卽位上尊號皇太后至治二年崩至治元年歲亦在酉安知其不在英宗朝予案本紀英宗卽位之歲八月附莊懿慈聖皇后於太廟是后已先沒故傳載冊文有爲天下母而養弗逮之句本紀有上太皇太后尊號事無尊皇太后事也紀書至治二年八月太皇太后崩亦不云皇太后故知后妃傳所載皆子虛烏有之詞耳

### 碑陰

右碑陰蒙古書自左而右元時凡制誥由詞臣潤色者國書但對音書之若加封大成至聖文宣王詔加封顏子父母制之類是也此係當時直言直語故別以國語譯之不依本文蓋亦當時令式如此而傳記未有言之者予以集錄之富攷證之勤粗

能識其大略爾碑陰有額乃蒙古篆文蒙古字勅於帝師八思巴其篆文未審何人所製

贈河南行省參知政事張斯和碑 至順二年十月

右贈河南行省參知政事張斯和碑斯和者中書參知政事斯立之兄以子友諒貴贈中奉大夫河南江北等處行中書省參知政事濟南郡公其先冀州棗強人六世祖汝礪金季避河決徙居章邱碑文翰林學士張養浩撰湖南廉訪使鄧文原書今在章邱縣東南相公莊南

碑陰記

右碑陰記載友諒歷官本末頗詳元史不爲友諒立傳以此碑攷之蓋由江淞行省左右司都事入爲吏部員外郎遷左司都事拜監察御史尋改左司員外郎以遷爲淞省正郎以左司郎

中召逆參議中書事拜戶部尚書臺奏爲浙西廉訪使改鄆水  
庸田使移湖北廉使復庸田使超拜中奉大夫江浙行省參知  
政事除憲淮東再憲江浙皆以浙省事重奏留天歷元年冬徵  
拜中書參知政事二年除江南行臺侍御史三年春徵內臺尋  
復參政冬十月陞中書左丞寶至順元年也元史文宗紀天歷  
元年八月戊午江浙行省參知政事張友諒爲中書參知政事  
此碑云冬者紀據除官之日碑據到官之日也宰相表於友諒  
下注云十月至十二月可徵其以十月到官與碑文合凡紀表  
年月小異者皆可以此例斷之矣碑文撰於致和政元之春逮  
至順二年立石則養浩文原已相繼沒於是禮部尚書張起巖  
記其碑陰而戶部尚書魏誼書之鄧巴西書當時與漁陽吳興  
齊名誼妙處不減巴西而陶南村書史會要獨遺之何也

加封顏子父母制詞

元統二年五月

右加封顏子父母制詞元史文宗紀至順三年五月追封顏子父無繇爲杞國公諡文裕母齊姜氏杞國夫人諡端獻妻宋戴氏兗國夫人諡貞素祭祀志則書此事於元統二年此碑後題元統二年五月日與祭祀志合制詞不及兗國夫人蓋別爲一制碑分二層上層蒙古書下層正書不著書人名氏

孝烈將軍祠像辨正記

元統二年六月

右孝烈將軍祠像辨正記孝烈將軍謂木蘭也姓魏氏毫之譙人記爲侯有造撰并書文與書法俱無足觀其以木蘭辭爲木蘭自作亦迂儒之見爾

重修從祀記

後至元四年九月

右重修從祀記今在南雄府學元至順三年裏邑張搏霄爲南

雄路總管命工繕刻七十二賢及道學先儒像於宣聖廟之兩廡而前進士易景升爲文記之攷元史王都中以天歷初任廣東道宣慰使都元帥元統初改兩浙都轉運鹽使自後未見再任廣東事此碑立於重紀至元四年而都中題銜稱中奉大夫廣東道宣慰使都元帥不可解也楊益字友直洛陽人陶九成稱其古隸學廬江太守碑今觀此碑分隸殊有漢人法度

濟瀆重建靈異碑記

後至元五年九月

右濟瀆重建靈異碑記爲孟州達魯花赤也列失追述其叔祖忽辛祀濟瀆靈異事所載世系云始祖賽天知苦魯馬丁追封世王子一人賽天知瞻思丁雲南等處行中書省平章政事追封咸陽王諡忠惠子三人長賽天知納速兒丁雲南等處行中書省平章政事追封延安王諡宣靖次忽辛江西等處行中書

省平章政事猶子賽天知烏馬兒江浙行中書省平章政事也  
列失則烏馬兒之子也賽天知元史作賽典赤中堂事紀作賽  
典只兒蓋回回貴族之稱子孫世以爲號瞻思丁父曰苦魯馬  
丁元史本傳不載納速兒丁本傳作訥速刺丁其謚宣靖亦史  
所失載也史稱賽典赤別庵伯爾之裔攷劉郁西征記報達之  
西馬行二十日有天房內有天使神胡之祖葬所也師名癖顏  
八兒房中懸鐵絙以手捫之心誠可及不誠者竟不得捫經文  
甚多皆癖顏八兒所作癖顏八兒卽別庵伯爾彼國中聖人也

佛慧禪師義公塔銘

後至元六年正月

右佛慧圓明正覺普度禪師斷崖義公塔銘道園學古錄載此  
文以石本校之殊多異同集本述問答機鋒及辭世語頗詳而  
石本轉略不可解也了義塔於天目山師子巖後雲深庵而碑

乃在蘇州之南禪寺殆其徒別刻本於吳中歟今寺稍移而西  
規制亦縮惟斯碑與明楊循吉所撰碑尚對立於菜畦瓜蔓閒  
爾

松江府重建廟學記 至正三年八月

右松江府重建廟學記前江浙等處儒學提舉黃潛撰平江路  
總管兼管內勸農事知渠堰事和立平書紹興路總管兼管內  
勸農事知渠堰事泰普華篆額泰普華即泰不華也元史本傳  
謂初名達普化文宗賜以今名此碑立於至正初仍書普字而  
當時士大夫亦多以達兼普稱之或稱爲達祕書則非定用所  
賜之名也蓋譯音初無定字達與泰不過音之轉而普化與不  
華北音亦無異兼普登第時榜書達普化後來受制命又作泰  
不華或偶出於文宗御筆而史遂以爲賜名耳碑稱皇朝奄有



南上凡五萬戶之縣悉置爲州惟華亭戶數增多至二十三萬特置散府號曰松江而仍以華亭爲縣隸焉案史載至順錢糧數松江府戶一十六萬三千九百三十一距立府之始五十餘年休養生息戶口當益繁而民數之減於舊者幾及三分之一殊不可解恐史有誤文也

勅賜元教宗傳碑

至正四年八月

右勅賜元教宗傳之碑延祐六年四月以開府儀同三司上卿輔成贊化保運元教大宗師知集賢院事領諸路道教事張留孫之請詔集賢修撰虞集述其傳授宗派於碑趙松雪時爲承旨奉勅書之洎至正四年嗣師吳全節立石去松雪之沒已廿餘年矣道園學古錄及類稿俱不載此文

重修南鎮廟碑

至正四年

右重修南鎮廟碑紹興路總管府推官貢師泰撰祀書卿泰不  
華書并篆額南鎮唐封永興公宋政和三年封永濟王金改永  
興王元大德二年加封昭德順應王此碑云唐天寶十年詔封  
永興公歷代遷著常祀同朝加號王爵似未攷宋金加封故事  
矣碑爲縣尹夏日孜修廟而作日孜字仲善吉水人至順元年  
進士史稱泰不華善篆隸溫潤遒勁今得此碑亦略見一斑矣

周伯溫遊白牛巖詩并序

至正六年

右廣東廉訪僉事周伯溫遊白牛巖詩潮陽縣達魯花赤倪列  
虎刻之巖壁並序其略以八分書之倪列虎者高昌人元時所  
稱畏吾兒也其先世爲畏吾國相從其主居倪輦河因以倪爲  
氏倪列虎之祖合刺善華嘗官江西宣慰使子孫因居江西習  
進士業登第者六人倪列虎由江西龍興籍鄉試登至順庚午

進士見歐陽圭齋所述僕氏家傳而江西通志以為至正戊子進士今觀此刻在至正丙戌迄戊子兩年列第已任監縣則江西志之誤顯然矣翁學士正三撰粵東金石略載此刻後半多缺文頃李潮陽素伯親到巖下始知為寺僧草庵所掩撤其庵詩之纔缺一二字爾因椎拓其文貽予并以語翁學士云

道山亭聯句

至正九年八月

右道山亭宴集聯句七言律詩一篇福建廉訪使僧家奴元卿僉事與魯赤文卿申屠駟子迪赫德爾本初四人各二句跋其後者經歷趙諱以八分書之者知事任允也後有廉訪副使朶兒只班善卿續題亦允所書詩與書法皆可觀予頃做計敏夫之例撰元詩紀事得之石刻者凡數十家此刻前人未有著錄者亟鈔而存之惜元卿文卿本初諸人未能攷其氏族也

東祁王先生歸田興學記 至正九年

右東祁王先生歸田興學記在嘉定縣學嘉定自宋始創學宮舊有田租歲入養士不繼邑士王子昭懼鄉校廢弛捐己田二十七頃有奇歲收租米一千一百一十餘碩擬創義塾以教鄉間子弟志未遂而疾作臨終囑其弟以田歸於學時至元二十五年也又六十餘年而邑之士大夫請州教授薛元德爲文記之州判官馬遂良書之石攷唐宋碑刻之式立石人當列名碑末此碑知州孫伯元立石刻於撰書人之後兼蓋人之前乃他碑所罕見者每行遶高一格則又以官秩之崇卑差之皆非古法也

山東鄉試題名碑記 至正十年十月

右山東鄉試題名碑記元時鄉試之所凡十有七兩都十一行

省真定東平二路山東河南二宣慰司也山東宣慰司治濟南  
是科考試官三人禮部尚書梁彥彥中國子助教黃昭銳滿翰  
林國史院典籍毛元慶文在監試官會山東東西道肅政廉訪  
司事拜住知貢舉官山東東西道宣慰使司同知副都元帥別  
速堅合所部三路十有三州四十有六縣之士試之得合格者  
蒙古四人色目五人漢人七人分左右勝右勝阿禮柏杭兄弟  
同舉左勝第一人李國鳳次年會試省元皆盛事也記稱鄉校  
未有題名題名自是科始今見存濟南府學者唯此及至正二  
十二年兩碑耳拜住字明善遼都思氏右勝狀元此記述其革  
陋扶偏禮士有法可見科目待人之效矣記文刻於碑之上方  
其下題名三列上層列考試監試知貢舉收掌試卷受卷彌封  
謄錄對讀各官中列左右勝進士姓名列提調試院監門巡

綽搜檢懷挾供給各官今時進呈鄉試錄之式蓋出於此

關王廟碑 至正十二年五月

右關王廟碑無撰書人姓名後題將仕郎汴梁路許州判官普顏立石普顏姓李氏陝西平涼人文稱王薨於章鄉今當陽縣玉泉山也今號大王塚每歲清明鄉人相率上塚如祭場之禮宋荆門守臣王銖始建祭亭環垣樹松柏紹聖三年五月賜廟額曰顯烈東廟曰昭貺卽侯子平也俗呼爲三郎荆楚之人相傳顯烈六月二十二日生昭貺五月十三日生是日朝拜祭賽者遠近輻輳焉案王之生日不見於傳紀碑所據者荆楚相傳之說今祀典遂以五月十三日爲王生辰矣文又云大元分樞密院知院總兵官南征至許昌南安營於至正十一年十一月十九日遣本院經歷文林郎和尚詣廟致禱施財增修廟宇攷

元史順帝紀至正十一年五月壬申命周知樞密院事禿赤以兵討劉福通授以分樞密院印九月壬子命御史大夫也先帖木兒知樞密院事及衛王寬徹哥總率大軍出征河南妖寇十月癸未命知樞密院事老章以兵同也先帖木兒討河南妖寇此稱知院總兵官當是也先帖木兒也

李世安題名 至正十三年良月

右海道都漕運萬戶燕山李世安題名在福州府之鼓山文云至正壬辰冬余以柏府之命如廣海經三山止神光寺明年正月朔寇過郡城是日與廉使許希文共守南門董督備禦越二十六日建邵分憲俞事郭繼先率援兵南下賊遂敗潰宵遁至正之世盜賊竊起侵犯郡縣史不能悉書未知其時寇福州者爲何賊也世安大都人父廷淮東宦慰使贈江西等處行中書

省參知政事追封洛陽郡公諡忠靖世安由國子生入官歷監  
察御史分憲淮東權鎮江路總管有治聲元史不爲立傳惟順  
帝紀載至正十二年五月海道萬戶李世安建言權倖夏運從  
之卽壬辰歲也予昔遊鎮江甘露寺見大殿銅鐘款有世安名  
驗其年月則至正九年也擬拓其文未果今得此題名乃撫其  
歷官本末書之

安慶城隍顯忠靈祐王碑

至正十六年四月

右安慶城隍顯忠靈祐王碑淮南行省參知政事余闕撰分隸  
道整而閑逸廷心以篆隸名家此其自書無疑余公大節彪炳  
古今獨其贈諡諸書所載互異元史本傳稱追封顯國公諡忠  
宣程國儒序青陽集則云諡文忠追封夏國公張紳以爲初贈  
夏國公諡忠愍改贈顯國公諡忠宣丁鶴年又稱爲余文貞公



宋景濂手定元史而集中余左丞傳亦作文忠未審孰得其真  
因錄此碑附及之

董仲珪弭寇紀功碑 至正十七年正月

右董仲珪弭寇紀功碑在潮陽東山雙忠廟雙忠者土人所祀  
唐張巡許遠二公也碑篆額止存寇字文凡二十六行首行殘  
泐尤甚可見者惟仲珪弭寇凱旋潮陽士民欲紀厥功數字文  
人得真爲廣西憲掾作開利民民號爲董公開知其姓董也此  
碑向來未有著錄者予得之潮陽令李南澗云

續蘭亭詩并序 至正二十年三月

右續蘭亭詩并序今在餘姚縣學邵吉士晉涵榻以遺予碑分  
四段最上一層爲圖水石竹樹極秀潤中有方池引以爲曲水  
者也池之上爲雪詠亭其左爲高風閣旁皆有題字次二層則

劉仁本所爲序三四層則諸人詩也序稱修禊來會四十二人今所存者惟仁本以下十二人詩各二篇意當時本刻二碑而亡其一乎元帥方永名見序中而詩失傳疑是谷珍之羣從也明詩綜載諸人姓名惟蕭山教諭朱炯誤作諸綱當從石刻正之

嘉定州重建儒學記 至正二十一年二月

右嘉定州重建儒學記元人以國語命名不繫以姓故秦狀吏牘與漢人連名漢人惟舉其姓國人必全舉其名如元史河渠志載耿參政阿里尚書元典章載章問平章張平章兀伯都刺平章之類至於公私稱謂亦然元人文集稱完澤公阿朮公徹理公皆繫公於名之下未有自爲完公阿公徹公者以其不成語也或有稱其氏族者若姚牧庵稱博羅歐爲忙兀公趙松雪

稱不忽木爲康里公施於碑版神道固宜而流俗則鮮能知之  
矣虞集正心堂記云忙侯名忙哥帖木耳稱忙侯省文從邦人  
之稱也蓋元自中葉以後里巷之民稱謂漸失其舊此碑稱鐵  
侯亦沿流俗之稱後云鐵侯名鐵穆爾普華與道園文同例蒙  
古色目各有氏族不得截取首一字爲姓而以下爲名元人尚  
知此法今世號稱古文者并此亦失之矣古人名字小印或用  
以鑒別書畫未有施於石刻者此碑末天台盧奐名下有二圖  
章石刻之有私印蓋滋觴於此奐本摹刻之工未諳古法若撰  
文之楊鐵崖書石之褚奐篆額之周伯琦初未有印也

察罕帖木爾祀先聖文

至正二十一年九月

右察罕帖木爾祀先聖及四配文察罕帖木爾卽齊國忠宣襄王  
也碑書帖爲帖兒爲爾與元史小異攷順帝紀至正二十一年

十月以察罕帖木兒爲中書平章政事兼知河南山東等處行  
樞密院事陝西行御史臺中丞此祀先聖在九月九日署銜已  
稱銀青榮祿大夫中書平章政事知河南山東等處行樞密院  
事兼陝西諸道行御史臺御史中丞則本紀所書月日未得其  
實矣是時察罕帖木爾自河南進兵山東羣盜略平遣本省都  
事尹師彥詣曲阜致祭孔子以充郕沂鄒四公配享鐫文於石  
後題龔封衍聖公希學曲阜縣尹克魯名碑書節鉞爲節越蓋  
以同音借用

擴廓鐵穆邇祀瀆記

至正二十二年八月

右擴廓鐵穆邇祀瀆記首云至正壬寅秋詔命擴廓鐵穆邇爲  
總兵授光祿大夫中書平章政事兼河南山東等處行樞密院  
事皇太子同知詹事元史順帝紀載擴廓帖木兒初授官位與

此正合察罕帖木兒以六月戊子襲害朝廷命其子代總兵必  
在秋初史繫於察罕帖木兒見殺之下蓋取便文不若此碑之  
得其實也察罕帖木兒傳稱起復擴廓帖木兒拜銀青榮祿大  
夫太尉中書平章政事知樞密院事皇太子詹事此則山東既  
平進加之職紀書於是年十二月本傳併而一之誤矣元初諸  
路萬戶兼理軍民世祖以後萬戶惟治軍不治民碑載濟源軍  
民萬戶野仙帖木耳陳貴二人蓋至正軍興之後所置百官志  
至正二十年以鞏縣爲招討軍民萬戶府二十六年置嵩州軍  
民招討萬戶府與此同時志有載有不載者有司采訪或不備  
也蒙古語錢曰帖木兒元人以爲名者極多其字或作鐵木兒  
或作鐵穆邇或作鐵穆而或作鐵穆耳或作鐵木而或作帖木  
而或作帖木耳或作帖木爾或作帖穆爾或作帖穆而或作帖

睦通或作貼木爾文殊而音義則一也今譯爲特穆爾

山東鄉試題名碑記 至正二十二年

右山東鄉試題名碑記在濟南府學明倫堂與至正十年碑東西相向而磨滅特其碑式與前碑同其小異者總行提調官總兵官中書平章政事口知河南山東等處行樞密院事皇太子同知詹事府郎中錄事通別爲一行在上方記文之後不與餘官竝列又提調官列名考試官之右正榜之後別有副榜爾是科考試官爲刑部侍郎孫翥河南江北等處行中書省儒學提舉吳顯兵部員外郎龍于鱗正榜十有一人副榜五人姓名可辨者三四人而已

溫州路總管陳所學墳誌 至正二十二年八月

右溫州路總管陳所學墳誌蓋其子姓所述故題云先考陳公

而末題孤哀子逢祥等泣血謹誌庚友丁卯科進士奉訓大夫  
前江西等處儒學提舉楊維禎填諱案顏氏家廟碑敘述先世  
皆直書其名而加諱字顧寧人博引張說陳子昂劉禹錫白居易  
易李翱諸人文證之以爲古人臨文不諱今人自述先人行狀  
而使他人填諱非古也予攷周益公跋初寮王左丞贈曾祖詩  
末題通直郎田稼填諱則宋人已有之鐵厓自稱庚友未審何  
義也所學以納粟授杭州路於潛縣稅務大使遷泉州路晉江  
縣稅務大使考滿陞福州鹽場牛田司丞又入粟數萬斛除同  
知詔州路總管府事未任再授温州路總管卒於官函骨航海  
歸葬墓在崑山縣馬鞍山之西南字甚工楷而不著書者姓名

崑山州重修三皇廟記

至正二十三年六月

右崑山州重修三皇廟記陳秀民撰文饒介書余詮篆額皆當

時知名士刻字者州人朱珪珪精於篆刻撰名蹟錄六卷亦名手也文前稱太尉承制以傑烈石同知州事後但稱石君元時蒙古色目人名有單稱下一字者石君籍隸鞏昌蓋亦河西之族矣

隆安遜公傳戒碑

至正二十四年九月

右大崇國寺壇主空明圓證大法師隆安遜公特賜澄慧國師傳戒碑資政大夫中書參知政事同知經筵事提調四方獻言詳定使司事危素奉勅撰文并書丹集賢大學士光祿大夫滕國公張璠奉勅篆額碑述戒本授受源流最詳善選卒於憲宗壬子歲至正二十三年以宣政使帖古思不華請追賜國師之號立碑崇國寺寺今名大隆善護國寺每月之七日八日十七日十八日二十七日二十八日陳設百貨都人雜沓謂之西席



市予在都門久從未一至所謂市者寺有元碑四通此其一也予好訪碑又惡市之礙公事之暇不值市期則往觀焉歲或一至或開歲一至寺僧皆黃帽所謂喇嘛班第者客至了不迎送不交一言獨來獨往而已攷四方獻言詳定使司至正十七年置有使副使掌書記而中書官提調之元之末季中外多故正宜納諫以通上下之情而設官以別擇之又命省臣提調之諫言之得聞者寡矣宜乎不旋踵而亡也碑稱丞相厦里者蓋在太宗時於史無所見姑記之以俟攷

碑陰

右宣政院劄付二道刻於碑陰之上方其一云皇帝聖旨裏宣政院至正廿三年十月廿三日哈喇章怯薛第一日明仁殿有時分云云後題右劄付大崇國寺准此蓋紀帖古思不花院使

陳奏及勅命危素撰文等事其一云皇帝聖旨裏宣政院至正  
廿六年正月口口日完者帖木兒怯薛第一日云云後半漫漶  
不能讀劉氏帝京景物略孫氏春明夢餘錄載此碑而不及碑  
陰故略書之

王用文題名

至正二十七年九月

右王用文題名在潮陽縣之白牛巖文云予偕陳中寶達時中  
周德源趙世延徐志仁趙東泉林汝文來遊期黃處敬戴希文  
不至時至正丁未秋九日靈武王用文誌凡十一行八分書大  
徑五寸巖之絕壁又有燦々二篆字亦用文所書大徑三尺甚  
奇偉竟不知燦爲何字也用文者潮州路總管王那木罕之字  
元時號河西人爲唐兀氏故亦稱唐兀其實王氏也北人語罕  
翰相近故亦以翰爲名用文生將家子元亡恥事二姓跡爲

黃冠者十年聞明太祖辟書至從容引決蓋司空表聖謝疊山之流世知其能許不知其又工篆隸頃潮陽縣知縣李素伯拓其文見貽予爲表而出之